

# حفرة وبس

مسرحية اجتماعية كوميدية

تأليف

أحمد المفتاح

## فكرة

### مسرحية (حفرة وبس)

تدور أحداث المسرحية في ساحة فريج شعبي متواضع .. وتحديداً في شارع السوق من هذا الفريج .. يتجمع فيه كل صباح بشكل اعتيادي مجموعة يتجاذبون أطراف الحديث ويمر الوقت وهم على هذه الحال في كل يوم إلا أن ما يؤرق الفريج وجود تلك الحفرة والتي يقع مكانها في منتصف المسرح ومن خلال الأحداث والمواقف والحوارات يظهر أنها موجودة منذ زمن ليس بالقريب .. وبعد فترة .. تأتي بعض الأفكار أنه لابد من عمل شيء مع هذه الحفرة التي أثرت على الناس بشكل أو بآخر .. ويأتي الاقتراح بمخاطبة البلدية لعمل تصرف ما .. في موضوع الحفرة .. ويأتي الرد أن البلدية تقرر عمل لجنة لمعاينة المكان لعمل اللازم فيما يخص الحفرة .. لكن وبعد مرور الكثير من الوقت لا يأتي أحد من البلدية مما يصيب أصحاب المحلات باليأس ..

هنا .. تظهر الفكرة التي سوف تغير وضع الفريج حيث يقترح أحدهم إلى أن تتحول الحفرة إلى معلم سياحي لجذب السياح .. يتحول السوق من مجرد سوق بسيط متواضع إلى شارع تجاري كبير .. ويتحول البائعين العاديين من مجرد بسطاء إلى تجار كبار .. وبعد فترة يظهر الطمع والأنانية ويدخل الخلاف فيما بينهم .. مما ينتج عنه أن يقوموا بالتسبب لمشاكل لبعضهم البعض ..

وكل يتهم الآخر بالعمل في محاولة التأثير على تجارته وبضاعته ..  
وأرباحه ..

فاهتمام كل أحد منهم بنفسه وتجارته بأنانية مفرطة بدلاً من تعاونهم  
مع بعضهم البعض لحل مشكلة الفريج الأزلية الحفرة .. أدى ذلك  
إلى أن قام كل منهم بحفر حفرة خاصة به ولكن ومع عملية الحفر  
هذه تبدأ قطع الديكور في التساقط دلالة على إنهيار الفريج ودفع  
الكل الثمن باهضاً .. من حياتهم وانتهى كل شيء في لحظة أنانية  
من كل هؤلاء الذين بحثوا عن مصالحهم الشخصية ..

## شخصيات المسرحية

بو عبدالله ..... صاحب محل الأقمشة

بو سعد ..... صاحب محل العطور

مرزوق ..... الحلاق

راشد ..... صاحب محل تخليص معاملات

سعيد ..... صاحب الدكان

بورشدان ..... رجل مسن جليس السوق

## المشهد الأول

( الديكور يعبر عن محلات متواضعة في سوق شعبي بسيط / محل  
أقمشة / محل لبيع العطور / حلاق / مكتب تخلص معاملات / دكان

..

وتتوزع هذه المحلات على خشبة المسرح .. ويفرق بين كل منهم  
ممر صغير .. لدخول وخروج الممثلين ..  
وفي منتصف المسرح يوجد فيما يشبه الحفرة حولها سياج بسيط من  
حبال مربوطة بشكل شبه دائري .. )  
بشكل متتابع يدخل أصحاب المحلات من عمق المسرح .. أو من  
جوانبه الأيمن والأيسر .. )

وهم : بو عبدالله : صاحب محل الأقمشة

بو سعد : صاحب محل العطور

مرزوق : الحلاق

راشد : صاحب محل تخلص المعاملات

سعيد : صاحب الدكان

بو سعد : صباح الخير بو عبدالله .

مرزوق وسعيد يدخلان مع بعض فيردان

مرزوق وسعيد : صباح النور ..

بو عبدالله : أما لو يدخل الحين راشد

راشد : أنا جيت .. تامر على شي يا بو عبدالله ..

بو عبدالله : بل بل .. كأننا متفقين .. ندخل السوق مع بعض ..

بو سعد : إي والله شفت شلون يا بو عبدالله ..

راشد : لا تحسدونا يالربع .. بعدين تجينا عين ..

مرزوق : تجيبا عين على شنو ..

سعيد : زين خل تجينا عين .. يمكن نتغير .. وتحل البركة علينا ..

وعلى سوقنا .. وعلى هالفريج اللي إحنا فيه ..

بو عبدالله : بل بل .. وايد أحلامك كبيرة يا سعيد ..

تحل البركة علينا .. وعلى سوقنا وعلى هالفريج بعد ..

بوسعد : إي والله شي واحد يكفي .. ليش كل هالأمنيات اللي ما  
شغنا منها شي من سنين ..

سعيد : شاسوي المثل يقول تفاعلوا بالخير تجدوه ..

مرزوق : أنا بس ودي في شي واحد ..

بو عبدالله : شنو تبي .. يا كثر من تهدد ولا تسوي شي .. قول قول  
شعندك ..

مرزوق : ودي اللي قال هالمثل .. أمسكه ..

بوسعد : (يقاطعه) بس بس واللي يرحم والديك ..

إي والله على قولت بوعبدالله .. يا كثر ما تهدد ولا تسوي شي ..

مرزوق : يمكن هاذيه اللي تم لنا .. نهدد ونتوعد .. لكن ما فيه فائدة

..

راشد : خلك في شغلك يا مرزوق .. وشوف كم واحد حلق عندك ولا  
 دفع الحساب للحين .. اللي يقولك ما عندي الحين .. وإلا يقولك ما  
 حلقتني عدل ما أبي أدفع .. وإلا يقولك في ريحة غريبة في محلك  
 ما أبي أدفع ..واللي يقولك .. سجل في الدفتر ..  
 واللي يقولك ..

مرزوق : بسك بسك .. دو دو دو .. دو دو .. ما تشبع من الكلام ..  
 خلك عاد إنت اللي كلش مخلص معاملات الناس ورايتك بيضا ..  
 أكثر اللي تاخذ معاملاتهم تمشي تمشي .. ومرة وحده توقف .. ليش  
 .. يقولك القانون ما يسمح .. وإلا القانون تغير .. وإلا المعاملة يبي لها  
 بوووش .. وما يضيع فيها إلا هالرجال اللي عطاك معاملته تخلصها



راشد : هااأشوف حولت علي ..

مرزوق : طبعأ بحول عليك .. يعني حلال عليك .. وحرام علي ..  
ومثل ما عندك لسان .. أنا بعد عندي لسان (( يقترب منه ويخرج لسانه  
(( حتى شوف شوف ..

راشد : بس خلاص خلاص .. لوعت كبدي ..

مرزوق : عيل خلك في محلك .. قبل لا يجيك شي ما يسرك ..

راشد : أشوف قمت تهدد يا مرزوقوه ..

مرزوق : أنا مرزوقوه .. كان فيك خير قرب عشان أعلمك من مرزوقوه  
..

راشد : اشتبي تسوي يعني .. أشوف بالله هذا أنا قربت

بو عبدالله : بس بس يا جماعة .. أذكروا الله إنتوا ربع وأهل فريج  
واحد .. لا تسوون كذيه ..

مرزوق : هو اللي بدا .. وإنتوا شفتوا وسمعتوا بروحكم كل الكلام  
اللي قاله ..

بوسعد : ياالله صباح خير .. شدةوه يالربع .. إحنا كل يوم نتناجر  
 لكن ما توصل هالمواصل ضرب وتهديد ,,  
 راشد : عاد انا اشقلت .. .. وأنت بعد ما قصرت .. صرخت علي كأي  
 اشتغل عندك .. الظاهر أنت ما عرفتني زين ..  
 بو عبدالله : خلاص يا جماعة .. ياه  
 بوسعد : وبعدين يعني .. ما أحد منكم راضي يهدي ..  
 سعيد : أفأاا عليكم ما يصير اللي تسوونه .. هاكم كل واحد يبرد على  
 قلبه بالعصير ..  
 راشد : إي نعم هذا الكلام بس عصير ..  
 ما عندك شي يناكل .. خاطري في شيبس ..  
 مرزوق : وين لك كبد تاكل شيبس من صباح اللي خير  
 راشد : يعني شبتحصل عند سعيد راعي الدكان إلا هالعصير والشيبس  
 ..  
 سعيد : لا دكاني مب مثل الأول .. تعالوا داخل الدكان وشوفوا  
 عندي كل خير .. بس هااا كله بحسابه ..

راشد : لا دام السالفة فيها حساب .. خل مرزوق يروح معاك الدكان ..

مرزوق : إيه باروح .. بس تحمل تبجي ..

راشد : لا يبه مب جاي ولا شي .. عندي شغل مب فاضي لكم ..

مرزوق : الله يسهل أمرك ..

بو عبدالله : أي خلکم جذيه ربع وأخوان كل واحد يدعي للثاني

ويساعده ..

بو سعد : الله يهديكم .. إحنا مب ناقصين ..

بو عبدالله : شالي مب ناقصين يا بو سعد .. فيك شي وإلا شي وإحنا

ما ندري .. علمنا يا خوك ..

بو سعد : اللي فيني ما أنت بغشيم عنه يا بو عبدالله ..

بو عبدالله : إي كآني عرفت قصدك .. تقصد الحفرة ..

بو سعد : وفي شي غير هاالحفرة .. صارت وحدة منا

وفينا .. كأنها من أهل الفريج يا بو عبدالله ..

بو سعد : إيه والله وأنت الصاج ..

بو عبدالله : ما يسوى علينا .. من متى وإحنا نكلم هالبلدية .. ونتصل  
 فيهم .. ولكن شتقول ..  
 يمكن ما يدرون ..

بو سعد : لا بو عبدالله يدرون ويشوفون ويعرفون .. لكن الموضوع ما  
 يهمهم .. ومب فريج حد من ربهم .. فساكتين عنه ..  
 بو عبدالله : عاد لي متى لي متى يا بو سعد لي متى

بو سعد : الله يعلم ..

بو عبدالله : الحفرة صار لها دهر .. وأحس إنها كل فترة تكبر ..  
 بو سعد : لا وين تكبر .. هاذي هي على حطت يدك من يوم ما  
 طلعت لنا مثل الفقع .. وهي على حطتها  
 بو عبدالله : بلاك ما تشوف يا بو سعد .. اقولك تكبر ..  
 مطر يصب عليها .. غبار .. هواء .. حركة الريح والجاي ..

بو سعد : لا عاد يا بو عبدالله .. كلها إلا حفرة هل كبير .. لا تهش ولا  
 تنش .. سويت منها سالفه .. مطر وغبار وهوا .. والناس اللي رايعين  
 وإلا جايين .. هذا إحنا كل يوم على هالحال رايعين وجايين .. ولا  
 حسينا بشيء ولا صار شي .. لا عاد في هاذي كبرت الموضوع ..  
 بو عبدالله : إلا الموضوع كبير وكبير وأنت تدري يا بو سعد .. بس  
 تقص على نفسك .. هالكلمتين  
 بو سعد : شلون يعني يا بو عبدالله .. أنت الظاهر تبي تسوي مشكلة  
 على هالصبح ..  
 بو عبدالله : لا يبه لا أبي أسوي مشكلة ولا شي .. وهذا أنا سكتت ..  
 وخلاص .. ( يضع يده على فمه ..  
 لحظة صمت .. ثم يقترب بو عبدالله من دكان راشد) أقول يا راشد  
 ..  
 راشد : سم يا بو عبدالله ..

بو عبدالله : أنت على كثر ما تروح وتمر على هالمصالح الحكومية ..  
 ما عندك حد في البلدية تعرفه يمر علينا ويشوف لنا صرفة مع هالحفرة  
 .. اللي واقفة في نص السوق مثل العظم ف البلعوم ..  
 راشد : إي والله صدقت يا بو عبدالله .. ليش أنا ما فكرت في  
 هالموضوع .. أعرف ناس وايد هناك ..  
 المرة الجايه لي رحت بأسألك عند من مثل هالمواضيع .. ولا يصير  
 خاطرك إلا طيب .. وlish المرة الجايه  
 الحين الحين باروح .. وخلاص اعتبر الموضوع عندي .. إلا اعتبر  
 الحفرة .. إنسدت ..  
 بو عبدالله : إي والله وياللي يرحم والديك .. تسوي فينا خير يا بوك  
 ..  
 ( يخرج راشد مسرعاً وهو في طريقه يصطدم في بورشدان .. ( رجل  
 مسن جليس السوق )  
 راشد : أووووه اسمح لي يا بورشدان .. ما شفتك ..

بورشدان : بل بل كسرت ضلوعي ما تشوف أنت ما تشوف .. عمي ..  
 راشد : ما شفتك يا عمي بورشدان .. قلت لك إسمح وأنا مستعجل ..  
 بورشدان : وبعد لك ويه تصارخ علي .. ( يرفع عصا يحملها محاولاً  
 ضربه ) ( يتداخل بينهما بو عبدالله ليفك راشد من بين يدي بو  
 رشدان )

بو عبدالله : خلاص يا بورشدان .. خله واللي يسلمك الرجال  
 مشغول .. لا تأخره عن مشاويره .. وأنا آسف وهذا راسك أحبه بعد ..  
 ( يقبله على راسه ) بس كف الرجال خله يروح في حال سبيله ..  
 بورشدان : كف الرجال .. اللي يروح في حال سبيله ..  
 بو عبدالله : أي فك الرجال .. خل يروح في حال سبيله ..  
 بورشدان : إي جيت الحين يا بو عبدالله للطنازة ..  
 بو عبدالله : أفا يا بورشدان .. أنا أتطنز عليك ..

بورشدان : أفا يا بورشدان .. أنا أظن عليك ..  
 بو عبدالله : أنت يا بورشدان ما تدري بغلاك ..  
 أنت حلاوة الفريج .. والسوق .. والمكان ما له طعم من دون  
 وجودك ..

بورشدان : لو المكان ما له طعم بدوني كان طرشت أحد يسأل عني  
 .. ويني ليش ما جيت .. يمكن تعبان  
 مريض .. فيني شي ..

بو عبدالله : لا تتغلى علينا يا بورشدان .. ما فيك إلا العافية ..  
 بورشدان : لا تتغلى علينا يا بورشدان .. ما فيك إلا العافية ..  
 (يقترّب منهم سعيد وفي يديه علبة عصير)

سعيد : إذا بورشدان ما يتغلى من اللي يتغلى عيل ..  
 بورشدان : من اللي يتغلى عيل ..  
 سعيد : أحلى عصير فواكة لبورشدان ..



بورشدان : بس بس .. ما جابلي السكر إلا عصيرك اللي كل يوم  
 غاثني فيه .. رايع بهالعصير .. وجاي بهالعصير .. زين جيب معاه شي  
 ثاني .. بسكوت .. شيبس .. أي شي .. عصير خالي .. ما ينفع ..  
 سعيد : حاضرين يا بورشدان .. إنت خذ هالعصير الحين والمرة  
 الجايه أجيب لك نمايم من كل اللي في الدكان ونق اللي في  
 خاطرك ..

بورشدان : نق اللي في خاطرك .. كل مرة تقول هالكلام .. وما شفنا  
 شي .. يا سعيد ..

سعيد : أفا عليك من اليوم ورايح راح تشوف اللي يسرك .. يا عمي بو  
 رشدان ..

بورشدان : عمي بورشدان .. ليش أنا كبر أبوك ..  
 أنا توني شباب .. وللهين أمشي بروحي .. وأدل الطريق .. وللهين  
 ما خرفت ..

بوسعد : (يقرب منهم وفي يده زجاجة عطر)

بو سعد : وعشان هالشباب يا بورشدان .. تفضل هالعطر من عند  
أخوك بو سعد ..

بورشدان : تفضل هالعطر .. من عند أخوك بو سعد ..  
لا تكفا .. وخر عني بعيد يا بو سعد .. ما أحد جاب لي حساسية إلا  
عطوراتك .. اللي ما أدري من وين جيبهم  
بو عبدالله : أووه جاتك الورة يا بو سعد .. يالله استلم ..  
والا أنت شاللي حادك .. شاللي يخليك تخلي دكانك وتجي هنيه ..  
بو سعد : هااا يا بورشدان .. أشوف قامت تاكل عيالها  
بورشدان : عاد تاكل عيالها وإلا ما تاكل عيالها .. عطوراتك تسوي  
لي حساسية .. وأتم أعاطس ثلاث أيام ورا بعض ..  
مرزوق : حيا الله بورشدان .. شلونك يبه ..  
بورشدان : حيا الله بورشدان .. شلونك يبه ..  
بخير بخير .. دام إنك بعيد عني يا مرزوق .. أنا بخير

مرزوق : أفا يا بورشدان .. دام أني بعيد عنك .. إنت بخير .. عسى  
ما شر .. يبه .. ليش هالكلام

بورشدان : إنت تدري ليش لازم تكون بعيد عني ..  
مرزوق : بورشدان كأنه شعرك طويل شوي .. خل أحلقك وأرتب  
لك شعرك ..

بورشدان : مو شالي خلى شعرك يحت غير مقصك وماكينتك ..  
أخبر شعري كان لي هنيه .. (يشير إلى نص ظهره من الخلف) وكنت  
أربطه عشان ما أحد يحسدني .. ومن يوم ما حلقت عندك ذاك اليوم  
.. إلا وبدأ يحت .. لي هاا شوفت عينك ما تم فيه شي .. مجنون أنا  
أحلق عندك .. مرة ثانية ..

بو عبدالله : (وهو يغمز بعينه للآخرين) عيل دام أنت ما في عاجبك  
عندنا .. ليش كل يوم جاي وتعطلنا على اشتغالنا ..  
بورشدان : أي أشغال يا بو عبدالله الله يهداك .. وين شغلکم .. أنا ما  
أشوف عندكم شغل ..

بورشدان : أي والله صدقت دام هالحفرة مرتكزة في وسط  
 هالسوق .. وين أحد يجي .. يشتري خلق .. وإلا ياخذ ماجلة بيته من  
 دكان سعيد .. وإلا على العين والنفس ياخذه له عطر .. بس عشان  
 يمشي سوق بو سعد شوي .. وإلا راشد محله أكثر النهار مسكر .. وهو  
 مسكين من مكان لي مكان .. يفتر ..  
 مرزوق : أشوف ما جبت طاريي يا بورشدان ..  
 بورشدان : ما جبت طاريي يا بورشدان .. أجيب طاريك في شنو ..  
 من زين حلاقتك وإلا من طيب أصل شغلك ..  
 مرزوق : أفاا يا بورشدان ..  
 بورشدان : لا أفا ولا شي .. وأنا لما باشوف أحد يقرب صوبك ..  
 بالحقه وباقوله .. لا يحلق عندك ..  
 مرزوق : هاذي آخرتها يا بورشدان ..  
 بو عبدالله : لا آخرتها وإلا أولها .. بورشدان يتغشمر معاك يا مرزوق ..

مرزوق : أنا في حسبة واحد من عيالك ..

بورشدان : الحمد أنه ما عندي عيال ..

( يضحك بورشدان ويتبعه الجميع حتى مرزوق )

بوسعد : الله يقطع بليسك يا بورشدان .. صج السوق ما لها طعم من

دون سوافك الحلوة ..

بو عبدالله : إي والله صدقت يا بوسعد ..

بوسعد : ما خلا حد في حاله استلم الربع كلهم ..

بو عبدالله : الله يخليك لنا ويحفظك يا بورشدان

بورشدان : الله يخليك لنا ويحفظك يا بورشدان ..

سعيد : باقي بس راشد ونكون متعادلين ..

بورشدان : إلا وين راح راشد .. دعمني كسر ضلوعي قبل لا يطلع ..

وللحين ما جا .. العادة هو ما يطول ..

بو عبدالله : راح الله يسلمك يكلم حد في البلدية .. خل يجون

يشوفون صرفة مع هالحفرة اللي مضيقة علينا السوق .. طاح سوقنا

واخترت تجارتنا والسبه هالحفرة ..

بو سعد : هذا هو راشد وصل ولد الحلال على طاريه ..

( يدخل راشد مسرعاً ويلهث قليلاً )

بو عبدالله : ها بشريا راشد .. شسويت ..

راشد : إن شا الله خير يا بو عبدالله .. كلمت مسؤول في البلدية ..

وشرحت له موضوع الحفرة .. قال لي إنه ما يقدر يسوي لي شيء ..

إلا لازم تجي لجنة وتعاين المكان وتحدد قطر الحفرة وعمقها ..

والسبب ..

بو عبدالله : أي سبب بعد ..

راشد : السبب يعني شلون صارت الحفرة .. ومن اللي تسبب فيها ..

بو سعد : لا فيها متسبب ولا شيء .. إنتوا كلكم تذكرون .. أصبحنا ذاك

اليوم ما وعينا اللي هالحفرة ساده علينا الطريق ..

راشد : أووووه .. أنا نشف ريحي من اسئلته ..

ما أجب على سؤال إلا وراه سؤال ثاني ..

ويكتب ويكتب ..

مرزوق : بل بل .. ليكون إحنا مسووين جريمة وإحنا ما ندري ..  
 راشد : شكلنا لو مسووين جريمة يمكن أهون ..  
 سعيد : وشنو الأسئلة اللي سألك إياها .. قولنا عشان لي جات اللجنة  
 نجاب نفس أجوبتك .. وما تكون أجوبتنا غير عن اللي قلته إنت ..  
 راشد : سألني الحفرة أي صوب ..  
 سعيد : زين .. وبعد ( كأنه يكتب في ورقة )  
 راشد : هيه إنت ليش تكتب ..  
 سعيد : أكتب الأسئلة والأجوبة وباوزعها عليكم .. واحفظوها ..  
 بو عبدالله : صج ما عندك سألقة يا سعيد .. يهال إحنا يهال ..  
 بو سعد : فرضاً جات اللجنة واسألوا أسئلة غير اللي اسألوها راشد ..  
 شنسوي ذيك الساعة ..  
 بنقعد نقط خيط وخيط .. وما نعرف شنقول ..

مرزوق : خلوها على الله يا جماعة .. واللي بيصير يصير .. أهم شي ..  
 .. خل يجون اهمه الحين في الأول .. وبعدين يحلها ألف حلال ..  
 بو عبدالله : زين عطورا شد ويه وإلا في مثل هالحالات اللي أعرفه ..  
 ما يعطونك ويه وخاصة لما يعرفون إن الحفرة في فريجنا ..

سعيد : يعني هم أعرفوا المكان ..

راشد : شلون عيل .. هاذيله البلدية .. إذا هم ما يعرفون المكان ..  
 من اللي يعرفه ..

سعيد : وشنو بعد من الأسئلة اللي أسألك أياها ..

بو سعد : وبعدين يا سعيد .. ردينا على طير ياللي ..

وشاللي يهمك من الأسئلة .. قوله قوله يا راشد ..

يمكن يسد حلجه ويسكت لما يعرف ..

راشد : بعدين بعدين يا سعيد .. لي صرنا بروحنا .. باقولك سؤال

سؤال ..

سعيد : وقوللي بعد .. جواب جواب ..



راشد : وإنّ ما عليك إلا إنت تكتب .. كل كلمة وكل حرف .. ولا  
 تنسى شي .. ( يهم بالإنصراف )  
 بو عبدالله : وين يا راشد .. وين رايح ..  
 راشد : خلاص بو عبدالله صار الظهر .. وأنا هاذي روحتي وألف من  
 مكان لي مكان ..  
 بو سعد : قبل لا تروح يا راشد .. البلدية ما قالوا لك متى راح تجي  
 اللجنة تعاين الحفرة .. على قولتهم ..  
 راشد : لا والله يا بو سعد .. ما قالوا .. بس ها أكيد .. يومين ثلاث  
 .. ثلاث اربع .. يعني كذيه ..  
 ياالله اسمحولي يا جماعة .. نشوفكم مسيان ..  
 في أمان الله ..  
 سعيد : أنظرنني يا راشد باسكر الدكان وباروح معاك ..  
 راشد : ياالله عاد لا تتأخر .. لأنني تعبان وابي اريح شوي قبل العصر ..  
 سعيد : ياالله ياالله .. (يذهب باتجاه دكانه ويغلقه بسرعه ويخرج وراء  
 راشد )

بو عبدالله : بورشدان ..

بورشدان : سم يا بو عبدالله ..

بو عبدالله : إلا ما قلت شي وما سمعنا صوتك ..

بو سعد : إي والله يا بورشدان .. شرايك في اللي صار ..

بورشدان : للحين ما صار شي يا بو سعد ..

البلدية قالوا لازم يشكلون لجنة تجي تعين الحفرة وبعدين .. يقررون

شنو راح يسوون .. ولي ما تجي ذيك الحزة يصير خير ..

مرزوق : ماشاءالله عليك .. كل المدة قاط الإذن علينا وتسمع كل

شي ..

بورشدان : ليش وانت علبالك أنا أصمج وما أسمع ..

مرزوق : لا لا حاشاك حاشاك يا بورشدان ..

بورشدان : إيه خلك كذيه .. وإلا بتشوف شي ما يسرك

مرزوق : أنا للحين باشوف .. شفت وخلص ..

عورتني عيني من كثر ما شفت .. اسمحولي بامشي

وإلا القعدة معاك يا بورشدان ما تنمل ..

بو عبدالله و بو سعد : حياك الله ..

(لحظة صمت)

بو عبدالله : شفيك يا بو رشدان .. ساكت وسرحان .. عسى ما شر ..

بو رشدان : ما فيني شي ..

بو سعد : كل هالصحة وما فيك شي ..

بو عبدالله : إيه والله العادة ما تخلي حد في حاله إلا لازم تعلق عليه

.. أو تقط عليه كلمة أو كلمتين ..

بو سعد : بو عبدالله صاج .. سكوتك غريب ..

بو رشدان : أفكر في الحفرة ..

بو عبدالله : ياااه كل هاذيه وتفكر في الحفرة .. الحفرة خلاص يا بو

رشدان .. إعتبر موضوعها إنتهى وإنحل ..

لا تحاتي ..

بو رشدان : لا والله لازم الواحد يحاتي ويحاتي ..

بو سعد : شاللي في بالك يا بو رشدان ..

بو رشدان : في بالي وايد أشياء ..

بو عبدالله : زين قول يا بورشدان .. يمكن نقدر نساعدك في شي ..  
بورشدان : ما عليه يا جماعة .. خل نشوف شبتقول اللجنة في  
موضوع الحفرة .. وبعدين باقوكم ..  
بوسعد : على راحتك يا بورشدان بعدين بعدين .. والله يكتب  
اللي فيه الخير ..

إظلام تدريجي  
نهاية المشهد الأول

### المشهد الثاني

(( نفس المكان السابق السوق والمجموعة في حالة من الترقب  
والإنتظار لقدوم أحد ))

بو عبدالله : هاذي الحين حالة يا جماعة .. صار لنا أكثر من شهر ننظر  
هاللجنة وللحين ما في أحد جانا ..  
بو سعد : المشكلة كل ما راح لهم راشد قولوا له .. زين وقريب .. ولا  
تحاتي ..

سعيد : إي والله مب حالة ..

بورشدان : إي والله مب حالة .. مب حالة إي والله ..  
سعيد : زين تكلمت يا بورشدان .. زين سمعنا صوتك ..  
بورشدان : ساشوي يا جماعة .. هذا أنا ناظر معاكم ..  
والله كريم ..

بو عبدالله : وراشد بعد تأخر .. هاذي طلعتة من الصبح وللحين ما جا  
.. كل هاذيه عشان يشوف اللجنة ليش تأخروا وما جو عندنا ..  
مرزوق : كل تأخيرته وفيها خيرته ..

بو سعد : إن شاء الله يارب هذا اللي نتمناه ..

مرزوق : (كأنه شاهد شيئاً من بعيد ) هذا هو هذا هو وصل ..

سعيد : ياه .. هاذيه كأنه جاي بروحه .. ما في أحد معاه

بو عبدالله : ياااه هاذي حالة الحين .. لو ما جا أحسن .. جاي بعد

يعور قلوبنا .. ما في شي جديد .. راح يقول نفس الكلام .. رحت لهم

إلا قالوا إلا قلت .. إلا قالوا إلا قلت .. وبس هذا هو ..

مرزوق : ما عليه يا جماعة .. خلوا الريال يوصل ونشوف شعنده ..

يمكن جايين وراه ..

بو سعد : بنشوف ..

( يدخل راشد مسرعاً وعلى وجهه شيء من الحزن .. )

بو عبدالله : ها بشر يا راشد .. ليش الجماعة ما جو معاك

بو سعد : تكلم شسويت معاهم هناك هالمرة .. هل من جديد ..

مرزوق : بو عبدالله بو سعد .. خفوا على الريال .. خلوه ياخذ نفس شوي ..

سعيد : استريح يا راشد .. وبرد على قلبك بهالماي .. وعقب تكلم .. راشد : (ياخذ قنينة الماء من يد سعيد ويشرب قليلاً)

رحت .. لكم .. وو

بو عبدالله وبوسعد : إي إي زين .. خلاص ..

راشد : أي خلاص يا جماعة .. أصبروا شوي ..

بو عبدالله : الحين صبرنا كل هالمدة جات على دقيقة وحدة .. بنصبر ..

بو سعد : تكلم ..

راشد : رحتم لهم .. وإلا ما حصلت نفس المسؤولين اللي كلمتهم ذيك المرة ...

بو عبدالله : ولا واحد ولا واحد من اللي شفتهم ذيك المرة ..

بو سعد : يمكن مغلط في المكاتب .. وإلا في العمارة

راشد : لا يبه لا مغلط ولا شي .. حافظ المكاتب والعمارة مثل كف  
يدي ..

سعيد : زين وشصار معاك هناك هالمرة ..

راشد : أووووه .. هالمرة اللي شفته هناك فتح ملف جديد و سأل  
نفس الأسئلة اللي اسألوني إياها ذيك المرة .. لا وزيد عليها أسئلة  
جديدة .

بو عبدالله : أووووه بعد

بو سعد : هاذي حالة الحين ..

مرزوق : زين إنت شسويت معاهم ..

راشد : بعد ساشوي جاوبت على كل الأسئلة .. آخر شي قاللي  
خلاص روح وإحنا بنصل فيك متى ما قررنا نمر المكان ونعاين  
الحفرة .. ونرفع تقرير .. وبعدين تجي الشركة .. ونسوي المطلوب ..  
بو سعد : أووووهوه .. هاذي سالفة الحين ..

بو عبدالله : لا حول ولا قوة إلا بالله ..

سعيد : وبعدين يعني .. إحنا ما بنخلص من هالحفرة ..



بورشدان : خلاص يبه .. هاذيله الظاهر .. ما منهم فايده .. أنا عندي  
لكم الحل ..

بو عبدالله : عندك الحل وساكت كل هالمدة ..

بو سعد : تكلم .. تكلم .. يا بورشدان ..

بورشدان : الحل إنكم تجمعون كم من بيزة ..

تخطون حطية .. ويشترون سميت وتجيئون تراب .. وعاملين ثلاث ..

بس كلها ساعة ساعتين إلا هالحفرة .. بح ..

بو عبدالله : إي والله صح كلامك .. يا بورشدان ..

بو سعد : يا ١١ سلام عليك يا بورشدان ..

بورشدان : وعشان ما تقولون بورشدان يتكلم ولا يسوي شي ..

(يدخل يده في جيبه) وهاذي حطتي أنا ..

مرزوق : ما شاء الله عليك يا بورشدان ..

( يقاطعهم راشد بحزم )

راشد : لحظة لحظة يا جماعة .. أي سميت وأي تراب وأي حطية ..

ما يصير ما يصير يا جماعة ما يصير ..

بو سعد : وشاللي ما يصير يا راشد ..

بو عبدالله : إيه والله أحسن من هالفكرة ما راح نحصل .. لا ننظر

فلان ولا فلتان ..

سعيد : شالسلفة يا راشد ليش ما يصير ..

مرزوق : إحنا نبي نفتك من هالحرفة .. وإنت تقول ما يصير ..

راشد : إي ما يصير .. قالوا لي هناك في البلدية .. تحملوا تسوون أي

شي في الحفرة .. خلوها على حطتها لين تجي اللجنة .. وإلا ترا ما

راح يسوون تقرير .. وما راح يدخل الموضوع لقسم المناقصات .. ولا

راح يرصدون لها ميزانية ..

بو عبدالله : أوووووهوووووه .. هاذيله حبالهم طويلة ..  
 لجنة تجي ولجنة تروح .. وتقرير .. ومناقصة .. وميزانية .. عز الله  
 خلصنا ..

بو سعد : وشنو الحل في نظرك يا راشد ..  
 راشد : الحين إحنا من زمان على هالوضع .. عشنا مع هالحفرة  
 وعاشت معانا .. شنو راح يصير لو صبرها كم من يوم ..  
 سعيد : بس إحنا من زمان مكلمينهم .. وللحين ما في أحد جا ..  
 راشد : زين أنا شاسوي المسؤولين تغيروا ..  
 مرزوق : بس ترا فكرة بورشدان زينه .. ع الأقل حل مؤقت لين  
 يشرفون الفريج ..

راشد : أنا قلت لكم .. هم قالوا إذا سويتوا شي في الحرفة .. ما في  
 تصليح من الحكومة .. وبعدين فرضاً جبنا عمال .. وسدوا الحفرة ..

شاللي يضمن لنا إنها ما ترجع مرة ثانية .. لكن شغل الحكومة  
مضمون .. راح يجي شركة كبيرة متخصصة في هالسوالف ..  
بو عبدالله : ما ندري شنقولك يا راشد ..

بو سعد : ما نقول إلا الله كريم .. الصبر بس الصبر  
مرزوق : عيل نروح نشوف شغلنا لين تشرف هاللجنة ..  
راشد : عن أذنكم يا جماعة .. أنا بامشي ..  
سعيد : الله يحييك ..

( بورشدان يهم بالقيام للخروج ثم يجلس ثانية / يقترب منه بو  
عبدالله )

بو عبدالله : عسى ما شري يا بورشدان .. إشفيك قمت وعقب قعدت ..  
بورشدان : شرايك في اللي أنا أفكر فيه يا بو عبدالله ..  
بو سعد : ما شاء الله عليك .. خوش فكرة يا بورشدان .. من وين  
جاتك الفكرة ..  
بو عبدالله : أي فكرة هو قال شي الحين ..

بو سعد : ياه تسوي نفسك ما تدري يا بو عبدالله .. أكيه الفكرة ..  
 تشع من عينه .. بطل بطل عينك يا بورشدان خل بو عبدالله يشوف  
 الفكرة ..

( بورشدان يفتح عينه )

بو عبدالله : لا إنتوا الأثنين مب صاحيين .. وأنا بعد مب صاحي إللي  
 واقف وأسمعكم .. وماعطكم ويه ..

بورشدان : لا تعصب يا بو عبدالله كله إلا زعلك ..  
 بس ترا أنا في بالي فكرة ..

بو عبدالله : الله يستر من أفكارك يا بورشدان ..  
 بو سعد : إي والله .. الله يستر من أفكارك ..

بورشدان : هااا أشوف كأنكم افتريتوا علي ..  
 بو عبدالله : لا افترينا عليك ولا شي ..

بو سعد : وشنهي فكرتك هالمرة يا بورشدان ..

بورشدان : الفكرة الله يسلمكم .. وإلا خلوها لي وقت ثاني ..  
 باقولكم ..

بو عبدالله : ياه الحين مقعدنا عندك وآخر شي تقول خلوها لي  
وقت ثاني .. باقولكم

بو سعد : زين يا بورشدان .. اللي تشوفه ..

بو عبدالله : أنا باروح البيت .. مع السلامة

بورشدان : كأنك زعلت يا بو عبدالله ..

بو عبدالله : لا لا زعلت ولا شي ..

بو سعد : عيل انظرنا خل نروح مع بعض .. شنسوي نقعد إحنا بعد

نجابل بعض ..

بورشدان : يالله .. توكلنا على الله ..

( يخرجون جميعاً بعد أن يغلق كل من بو عبدالله وبو سعد محلاتهما

(

إظلام تدريجي

نهاية المشهد الثاني

### المشهد الثالث

(نفس المكان في المشهدين السابقين)  
الممثلين متوزعين في أنحاء المسرح إلا بورشدان الذي لم يحضر  
بعد .. لكن هذه المرة المحلات مغفلة  
والجميع في حالة من الصمت والسرхан .. ودون أي كلمة من أي  
منهم .. أو حركة ..)

بو عبدالله : (واقفاً على حافة الحفرة ويخاطبها) وبعدين يا حفرة ..  
 لي متى راح تتمين قاعدة لنا مثل العظم في البلعوم .. خلاص ملينا  
 منك .. انسدي وفكينا ..

خلاص خلاص تعبنا .. من ويهك ..  
 بو سعد : بو عبدالله .. إشفيك الله يسلمك تكلم الحفرة .. هاذي الا  
 حفرة .. حفرة .. لا تتكلم ولا تتحرك ..

بو عبدالله : لا هي يمكن ما تتكلم لكنها تتحرك ..  
 بو سعد : ياا بو عبدالله .. أذكر الله أقولك هاذي حفرة .. شلون  
 تتحرك ..

بو عبدالله : تتحرك لأنها كل يومين ثلاث تكبر .. وتتوسع

بو سعد : كم مرة قلت لك يتروالك يا بو عبدالله .. وإلا إنت كبرت  
وما قمت تشوف عدل ..

بو عبدالله : لا أنا أشوف أحسن منكم كلكم ..

سعيد : خلاص يا جماعة أذكروا الله .. ترى اللي فينا مكفيننا ..

مرزوق : ولا يهملك يا بو عبدالله أنت تشوف أحسن منا كلنا .. بس

وخر شوي من الحفرة لا تطيح على غفلة ..

بو عبدالله : ما راح أطيح .. لا تحاتي .. بس أبي أشوف آخرتها مع

هالحفرة .. يا أنا يا هي ..

سعيد : الحين راشد جاي من البلدية .. وإن شاء الله عنده خبر زين

لنا ..

(( يدخل بو رشدان .. ويجلس في مكانه المعتاد ))

بو رشدان : شفيك يا بو عبدالله واقف على طرف الحفرة ..

بو سعد : واقف يسولف معاها يا بو رشدان ..



بورشدان : أيبويه .. الكبر شين يا بو عبدالله الكبر زين وإلا أقول  
الحمد لله على نعمة العقل ..

بو عبدالله : قول اللي تبي تقوله .. تمون يا بورشدان ..  
تمون ..

بو سعد : إي بوراشدان يمون .. لكن إحنا ما قلنا أي كلمة .. إلا  
كلتنا بثيابنا ..

بو عبدالله : يا أخوك أنا وبورشدان .. نمون على بعض ..  
إنت شدخلك بينا ..

بو سعد : الله يا الدنيا .. أنا شدخلني بينكم .. زين زين يا بو عبدالله  
..

بو عبدالله : شاسوي لك يا بو سعد الله يهداك .. أحر ما عندي أبرد  
ما عندك ..

(( سعيد .. يذهب بسرعة نحو المكان الذي سيدخل منه راشد ))

سعيد : هذا هو راشد جاي .. جاي يا جماعة ..

(يدخل راشد ببطء ورأسه في الأرض)

بو سعد : ها بشر بشر يا راشد ..

(( راشد يمشي ويجلس على أول كرسي يواجهه ))

مرزوق : راشد .. تكلم شالسالفه ..

بو عبدالله : خرعتنا .. صاير شي ء .. تكلم ..

راشد : اتكلم شنو أقول .. ما في شي خلاص ..

سعيد : شنو يعني ما في شي .. خلاص

راشد : أي خلاص ما في شي ..

بو سعد : زين شنو يعني ما في شي ..

راشد : يعني خلاص ..

بو عبدالله : وبعدين معاك .. أخلص وقول لنا .. اشصار معاك في

البلدية ..

راشد : لا فيه لجنة ولا مناقصة ولا حد راح يسد الحفرة .. ولا شي ..

بو عبدالله : يا سلام .. زين شنو السبب ..

راشد : يقولون ما في عندهم ميزانية ونقص في العمال ..

وفريجنا قديم .. وعددوا وايد أسباب في ورقة هالطول

سعيد : زين وإحنا اللي ناظرين كل هالمدة ما لنا أهمية  
مرزوق : والله مشكلة .. هاذي حالة الحين .. وإنت رايح وجاي من  
عندهم ..

بو سعد : زين دام الموضوع جذيه خلاص ناخذ بفكرة بورشдан ..  
ونجيب عمال يسدون الحفرة .. وجذيه ما في أحد يقدر يقول لنا لا  
.. وإلا شرايك يا بورشدان ..

بورشدان .. شفيك سرحان يا أخوك ..

بورشدان : (يقوم ويمشي بين المجموعة .. ويتأمل في وجوههم)

بو عبدالله : عسى ما شر .. إشفيك تتمقل في وجوهنا ..

بو سعد : باسم الله عليك يا بورشدان . إشفيك ..

بورشدان : ما فيني إلا كل خير ..

سعيد : زين تكلم .. نبي تعرف هالخير

بورشدان : يعني الحين خلاص لا في لا لجنة ولا مناقصة ولا شي ..

راشد : إي نعم خلاص ما في ولا شي ..

مرزوق : يعني الحين نقدر نخط خطيه ونجيب عمال يسدون الحفرة

.. و خلاص نفتك منها للأبد .. ويرجع السوق مثل أول وأحسن ..

بورشدان : لا ..

بو عبدالله : يا اه ليش لا بعد ..

بو سعد : بورشدان .. شالسالفة .. مب هاذي كانت فكرتك ..

راشد : الحين خلاص ما في أحد بيقولك شي ..

بورشدان : أدري عشان جذيه نخلي الحفرة ..

سعيد : شلون نخلي الحفرة بعد .. جذيه ما سويننا شي ..

بورشدان : بنسولي .. بنسولي أشياء وأشيا مب شي واحد بس ..

مرزوق : والله كلامك عجيب وغريب يا بورشدان ..

بو عبدالله : فهمنا يا بورشدان .. شاللي في بالك ..

بورشدان : إنتوا ما تبون الناس تجي السوق ..

بو سعد : أكيد نبي ..

بورشدان : ما تبون محلاتكم تكبر وتجارتم تتوسع .

راشد : ياه هذا عز الطلب ..

بورشدان : ما تبون الشارع ما يخلي من الشرايين والرايين

والجاين ..

بو عبدالله : طبعا يا بورشدان نبي كل هاذيه .. بس شلون يصير

هالشي والحفرة موجودة ..

بورشدان : حولوا هالحفرة لمعلم سياحي ..

الجميع : شلووون .. معلم سياحي ..

إظلام تدريجي

نهاية المشهد الثالث

### المشهد الرابع

(( نفس المكان لكنه هذه المرة تغير حيث توسعت المحلات وكبرت  
وتزينت ووصغت لوحات كبيرة لكل محل .. أما الحفرة فوضعت بعض  
الزينة البسيطة عليها كمعلم سياحي ))

((على يمين المسرح بو عبدالله ملقباً خطابه للكواليس كأنه يودع  
وفداً سياحياً غادر المكان منذ قليل))

بو عبدالله : الله يحييكم ما قصرتموا على الزيارة .. تعالوا كل مرة ..  
وكل مرة راح تشوفون شي جديد في الحفرة  
هاذي حفرتم .. منكم ولكم .. باي باي .. قود دي ..

((وعلى يسار المسرح بوسعد كأنه يودع وفداً سياحياً آخر)) □

يتحدث في نفس الوقت الذي يتحدث بو عبدالله □

بوسعد : يا هلا يا هلا ومرحبا فيكم نورتوني .. نورتو محلي .. إن  
شاء اعجبتمكم العطورات الحصرية اللي عندنا بس .. نشوفكم قريب ..  
قريب

بو سعد : بس يا بو عبدالله .. أذيتنا من كثر ما يصارخ  
تكلّم شوي شوي .. تبي يعني تقول لنا كان عندك وفد أجنبي ..  
درينا وعرفنا ..

بو عبدالله : وأنت يعني اللي ما قصرت .. صوتك واصل لي آخر  
الفريج .. عاد من زين بضاعتك .. كلها عطورات مضروبة ..  
بو سعد : أيه هيه .. لو عطورات مضبوطة كان ما صار محلي كذيه ..  
عود وواسع والريحة واصله من أول السوق لي آخره .. أحمد ربك  
إنك تشم ريحة حلوة ..

بورشدان : بسكم يا جماعة .. إشفيكم كل واحد في راس الثاني ..  
خلاص كل واحد يشوف شغله ..

بو عبدالله : عاد هاذي كله افكارك بورشدان .. وإلا في ناس .. عيال  
فقر .. ما يفيد معاهم العز والخير ..  
بو سعد : من قصدك عيال فقر ..

بو عبدالله : أنا ما حددت حد .. لو أنت تشوف نفسك كذيه ..  
كيفك ..

بو سعد : شلون يعني .. تبي تتهاوش في كل مرة يا

بو عبدالله .. جوز رجال أشكرك تبي تتهاوش

بو عبدالله : أي أبي أتهاوش .. لو فيك خير تعال ..

بو سعد : أنت لو فيك خير تعال ..

بو عبدالله : أنا أجيك أنت ليش يبه ليش ..

بورشدان : يا جماعة .. خلاص .. خلکم من هالهواش .. وشوفوا

راشد صار له ساعة واقف عند الحفرة .. ويحاكي روحه ..

(( يقترب منه بورشدان بينما يذهب كل من بو عبدالله وبوسعد

لمحله وعينه على الآخر ))

بورشدان : إشفيك يا راشد .. ليش واقف عند الحفرة .. وتحاكي

نفسك ..

راشد : بکرا في وفد سياحي راح يجي لي ... وقاعد أفکر ألف لهم

قصة عن الحفرة .. وشلون صارت .. وشنو فيها .. وليش صارت معلم

سياحي ..



بورشدان : يعني لما توقف عند الحفرة هي اللي بتقولك ..  
 راشد : لا هي اللي راح تلهمني الكلام اللي باقوله للوفد السياحي ..  
 بورشدان : والله ما عندك سالفه علبالي عندك شي ..روح يبه روح  
 شوف شغلك .. لا تطيح في الحفرة ..  
 وعقب يطيح سوق الحفر .. وتصير قبر سياحي ..  
 راشد : أفا شلون تصير قبر سياحي ..  
 بورشدان : إي لأنك إذا طحت في الحفرة .. ما راح تكون لها  
 فايذة .. بندقها .. وبيطيح السوق بعدين ..  
 راشد : أي والله صدقت يا بورشدان .. تسلم ما قصرت على  
 هالفايدة ..

(( في هذه الأثناء يدخل سعيد ومرزوق بعد أن يعلو صوتهما من  
 الخارج قبل دخولهما على خشبة المسرح ))

سعيد : تعال تعال وأنا أقولك وين صارت الزيادة .. شوف شوف هنيه ..  
 أنا قبل كان دكاني هنيه .. وأنت لما جبت الشركة اللي سوت لك  
 ديكور محلك تجاوزا على دكاني خمس أمتار .. خمس أمتار ..

مرزوق : والله ما عندك سالفه الحين ماخذني بشراع وميداف تعال  
 وتعال عشان خمس أمتار راحوا من دكانك ..

سعيد : لو سمحت هذا قبل قبل كان دكان .. الحين ما تقرأ .. هايبر  
 ماركت .. هايبر ماركت ..

مرزوق : زين هايبر ماركت .. الله نسيت أيام الدكان اللي كله فيران  
 ..

سعيد : حدك حدك على دكاني .. قصدي هايبر ماركتي مرزوق : زين  
 كم تبي أدفع تعويض وتفكني .. من حنتك وصراخك ..

سعيد : ما أبي تعويض .. أبي تقط الطوفة وتدخل حلاقك منك مثل  
 ما كان قبل ..

مرزوق : لو سمحت هذا قبل كان حلاق الحين إسمه صالون ..  
 صالون .. ونسوي كل شي .. حمام بخار كامل .. وسبا .. وتدليك ..  
 وتجهيز معاريس ..

والشهر الجاي راح نفتح القسم النسائي .. قال شنو قال حلاق قال ..  
 سعيد : خلك الحين من هالكلام أفهم من كلامك إنك ما تبي تقط  
 الطوفة ..

مرزوق : لا ما أبي أطق الطوفة .. شعندك يعني إشتبي تسوي ..  
 سعبد : خلاص كيفك ما تبي تطق الطوفة .. بكرا أنا باروح أشتكي  
 عليك في البلدية ..

راشد وبورشدان (بصوت واحد) : لا .. لا

بورشدان : لا أي بلدية .. البلدية .. لا .

راشد : تكفون يا جماعة البلدية لا إنتوا تبون .. تخربون سوقكم  
 بروحكم ..

بورشدان : خلکم یبه کل واحد في مكانه اللي هو فيه .. وخلصوا  
 موضوع المعلم السياحي يمشي ..  
 راشد : بعدین أنت یا سعيد خلاص الريال قال إنه راح يعوضك ..  
 خذ التعويض وأسكت ..  
 سعيد : عشان خاطرك بس یاراشد .. وإلا هاذیه ..  
 مرزوق : هاءا هاذیه شنو ..  
 سعيد : خلني ساكت أحسن .  
 مرزوق : إيه السالفة فيها تعويض .. سكتت ..  
 بورشدان : إيه خلکم كذیه .. یالله تعالوا داخل محلك یا سعيد نتفق  
 ونكتب بیکم عقد ..  
 سعيد : أي محل .. هایبر مارکت ..  
 بورشدان : زین یبه زین .. هایبر مارکت لا تزعل .. بس  
 فكونا الحین یالله جدامي .. (( تدخل المجموعة محل سعيد ))

(( هنا يخرج بو سعد بهدوء .. ويقترب من محل بو عبدالله فيخرج له

بو عبدالله ))

بو عبدالله : نعم آمر ..

بو سعد : ما آمر عليك عدو .. بس ...

بو عبدالله : بس شنو أخلص ..

بو سعد : شدعوه يا بو عبدالله .. إنت أخو دنيا وإحنا ربع من سنين

.. وهادي دنيا .. والحلال واحد ..

بو عبدالله : شتبي أخلص ..

بو سعد : أحس إنه كأن محلك جاي على محلي .. شوي .. شوي

بس مو وايد ..

بو عبدالله : شنو المطلوب يعني .. شنو القصد ..

بو سعد : القصد إنه تعرفه وما يحتاج أقولك ..

بو عبدالله : لا ما أعرفه .. قول لي .. شنو القصد ..

بو سعد : يعني يا تقط الطوفة .. يا تعطيني تعويض .. هذا يسمونه

تعدي على أملاك الآخرين ..

وزيدت محلي على محلك زين .. لكن لا باقط الطوفة ولا راح

أعطيك تعويض .. زين وصل الحجي .. يا لله واللي تبي تسويه سوا ..

بو سعد : ھا ۱۱۱۱ جزیه یعنی زین .. انا باراویک یا بو عبدالله .. کلها

**إلا حفرة .. وحفرة مكانها حفرة ..**

**بو عبدالله : شلون یعنی ..**

**بو سعد : الحين باقولك شلون ..**

(( يدخل إلى محله ويأتي بفأس ويبدأ في الحفر ))

**بو عبدالله : إشفيك أنت شتسووي مب صاحي ..**

**بوسعد: مثل ما أنت شايف باحفر حفرة جديدة عند محلي .. معلم**

## سياحي لی انا بروحي ..

**بو عبدالله : وأنت مب أحسن منى .. ( يدخل ويأتى بفأس ويبدأ هو**

## الآخر في الحفر))

(بعد لحظات تخرج المجموعة الأخرى بعد ارتفاع صوت الحفر))

بورشدان : إشفیکم یا اا جماعة .. شتسوون ..  
 بوسعد : نلعب خشيشة .. مثل ما أنت شايف يا بورشدان .. أحفر  
 حفرتي .. لي أنا بروحي بس ولا أحد له خص فيها ..  
 بورشدان : وإنت يا بو عبدالله .. شتسووي ..  
 بو عبدالله : أدور فقّع .. بوسعد مب أحسن مني .. مثل ما بيكون  
 عنده حفرة .. أنا بعد أبي حفرتي لي بروحي  
 بورشدان : هذا ما يصير يا جماعة .. هالحفرة هاذي .. شبنسوي فيها  
 ..  
 بوسعد : هاذي خلها لك يا بورشدان ..  
 بو عبدالله : مب أنت اللي قلت لنا سووها معلم سياحي .. خلاص ..  
 خلها لك ..  
 بورشدان : بس كذيه يا جماعة ما يصير ما يصير ..

بو سعد : عاد يصير وإلا ما يصير .. أنا في في أذني ماي  
 بو عبدالله : وخر وخر يا بو رشدان واللي يرحم والديك  
(( يتركهم ويذهب للمجموعة الأخرى ما أن اقترب منهم حتى ذهب  
 كل منهم لجلب فأس وبدأ يحفر ))  
 بو رشدان : وإنتوا بعد ليش تسوون مثلهم ..  
 راشد : كلها إلا حفرة ..  
 سعيد : ما في أحد أحسن من أحد ..  
 مرزوق : كل واحد تكون له حفرة بروه بلا منة أحد  
 بو رشدان : ما يصير يا جماعة جديه .. بعدين فريجنا راح يتحول كله  
 حفر .. وهذا مب حل ..  
 بو عبدالله : شوي منيه يا بو رشدان ..  
 بو سعد : وخر عن طريق حفرتي  
 راشد : حاسب يا بو رشدان لاتطيح في حفرتي  
 سعيد : لا لا منيه لا تقرب . هنيه حفرتي  
 مرزوق : كلها إلا حفرة



(( هنا يبدأ الغبار يملأ المسرح وتبدأ أصواتهم تتداخل مع بعضها

البعض .. ))

بو عبد الله : حفرة وبس .. هاذي حفرتي وخر ..

بو سعد : إنت اللي وخر ... هاذي حفرتي أنا

راشد : كلها إلا حفرة .. حفرة وبس .. لا تقرب من حفرتي ..

سعيد : حاسب إنت .. حاسب .. هاذي حفرتي أنا

(( بعد لحظات وقبل أن تتلاشى الرؤية يزداد صراخهم على بعضهم

البعض ومن ثم وبالتدريج ومن كثرة الغبار .. يبدأون يكحون بشكل

متقاطع ثم متواصل ))

(( في كل هذه الأثناء يزداد صراخ بورشدان عليهم حتى يتوقفوا

لكن دون جدوى ))

بورشدان : بسكم يا جماعة .. خلاص .. لا تسوون جذيه .. حرام  
عليكم .. كفاية حفرة وحدة .. ليش كل واحد منكم يحفر له حفرة له  
بروحه .. ليش يا جماعة .. ليش خلاص وقفوا .. وقفوا .. لا تسوون  
جذيه ..

إِظلام تدريجي  
النهاية  
أحمد المفتاح

